

SOALAN NO: 21**PARLIMEN MALAYSIA**
PEMBERITAHU PERTANYAAN DEWAN RAKYAT**PERTANYAAN : Lisan****DARIPADA : Datuk Haji Shabudin Bin Yahaya
[Tasek Gelugor]****TARIKH : 27 Julai 2017****SOALAN : Datuk Haji Shabudin Bin Yahaya
minta MENTERI PERTANIAN DAN
INDUSTRI ASAS TANI menyatakan: -**

sejauh manakah projek ikan sejuk beku Q'Fish telah berjaya memberi impak yang tinggi khususnya dalam mengatasi masalah beban kos sara hidup rakyat serta bagaimanakah ianya dapat mengimbangi kenaikan harga pasaran ikan secara mendadak.

JAWAPAN

Tuan Yang Dipertua,

Program Q'Fish telah diperkenalkan pada tahun 2016 dengan objektif pelaksanaan seperti berikut:

- 1) Menawarkan ikan segar beku berkualiti sebagai pilihan dengan harga yang berpatutan kepada pengguna;
- 2) Menggalakkan gaya hidup sihat melalui pemakanan ikan segar beku sebagai sumber protein utama;
- 3) Meningkatkan permintaan ikan segar beku melalui kaedah promosi dan rangkaian pemasaran yang efisien; dan
- 4) Meningkatkan bilangan penglibatan usahawan pemasaran ikan bagi mewujudkan peluang-peluang pasaran hasil tangkapan ke pasaran yang berpotensi.

Secara amnya, harga jualan ikan segar beku Q'Fish adalah lebih rendah berbanding harga spesies ikan yang sama di pasaran, iaitu di antara 9 hingga 28 peratus. Sehubungan itu, penggunaan ikan segar beku Q'Fish sebagai alternatif

kepada ikan basah secara tidak langsung dapat mengurangkan beban kos sara hidup rakyat sekaligus mengimbangi kenaikan harga ikan secara mendadak.

Spesies ikan segar beku Q'Fish yang telah dipasarkan adalah kembong, selar, pelaling, selayang, cencaru, aya, tilapia dan keli.

SOALAN (22)

**PEMBERITAHUAN PERTANYAAN
DEWAN RAKYAT, PARLIMEN MALAYSIA**

PERTANYAAN : LISAN

TARIKH : 27 JULAI 2017
[KHAMIS]

DARIPADA : YB DATO' ABDULLAH SANI BIN ABDUL HAMID
[KUALA LANGAT]

SOALAN :

YB DATO' ABDULLAH SANI BIN ABDUL HAMID [KUALA LANGAT] minta **PERDANA MENTERI** menyatakan peratus pengangguran yang berlaku pada tahun 2016 dan kerangka untuk menyelesaikan isu ini.

JAWAPAN :-

Tuan Yang di-Pertua,

Untuk makluman Ahli Yang Berhormat, kejayaan ekonomi kita menyediakan peluang pekerjaan menyebabkan kadar pengangguran kekal rendah iaitu di bawah 4%. Laporan Penyiasatan Tenaga Buruh yang dikeluarkan oleh Jabatan Perangkaan Malaysia menunjukkan kadar penyertaan tenaga buruh sehingga suku tahun keempat 2016 adalah 67.6% dan kadar pengangguran berada pada kadar 3.5%. Kadar pengangguran bagi negara ini adalah stabil antara 3.1% hingga 3.7% semenjak tahun 1990an. Negara dianggap telah mencapai guna tenaga penuh sekiranya kadar pengangguran adalah 4% dan kurang yang mana selari dengan definisi *Organisation for Economic Co-operation and Development* (OECD).

Tuan Yang di-Pertua,

Kerajaan telah mengambil langkah secara holistik dalam menangani isu pengangguran di peringkat nasional melalui kerangka yang disediakan di dalam Inisiatif di bawah Rancangan Malaysia Kesebelas (RMKe-11) 2016 hingga 2020 mengunjurkan pewujudan peluang pekerjaan

sebanyak 1.5 juta pekerjaan baharu menjelang tahun 2020. Di dalam kerangka tersebut Kerajaan memberi tumpuan kepada empat bidang fokus iaitu:

PERTAMA, Bidang Fokus A iaitu menambah baik kecekapan pasaran buruh untuk meningkatkan pertumbuhan ekonomi melalui usaha meminimumkan ketidakpadanan (*mismatch*) dalam pasaran buruh di mana Jawatankuasa Jurang Kemahiran Kritikal ditubuhkan bagi mengenal pasti jurang kemahiran kritikal, dalam sektor strategik bagi perancangan modal insan akan datang.

Kerajaan turut memberi tumpuan bagi mengatasi pengangguran belia menerusi program seperti Skim Kemahiran Kerjaya 1Malaysia (SKK1M), Sistem Latihan Dual Nasional (SLDN) dan 1Malaysia *Skills Training and Enhancement for the Rakyat* (1MASTER).

Selain itu, penyertaan wanita dalam pasaran buruh akan terus dipertingkatkan. Sebagai contoh, Kerajaan akan memperluas akses kepada pekerjaan menerusi program 1Malaysia *Support For Housewives* dan *Flexiworklife*. Kaum wanita juga digalakkan untuk

menjadi usahawan menerusi program seperti Azam Niaga, *Women Entrepreneurial Incubator* dan 1Nita.

Pada ketika ini, Kerajaan menerusi Kementerian Sumber Manusia akan memperkenalkan Sistem Insurans Pekerjaan (SIP) yang merupakan program jaringan keselamatan sosial yang terdiri daripada dua komponen utama iaitu Insurans Pekerjaan dan Dasar Pasaran Buruh Aktif. Insurans Pekerjaan akan membantu pekerja kehilangan pekerjaan dengan menyediakan bantuan kewangan sementara (*temporary income replacement*) semasa mencari pekerjaan baharu. Manakala Dasar Pasaran Buruh Aktif pula menyediakan bantuan carian pekerjaan (*job search*), penempatan pekerjaan (*job placement*) dan latihan. Bantuan *reskilling* dan *upskilling* membantu pekerja kehilangan pekerjaan memiliki set kemahiran (*skills set*) yang diperlukan oleh industri seterusnya meningkatkan *employability*.

Tuan Yang di-Pertua,

KEDUANYA, Bidang Fokus B iaitu mentransformasi TVET untuk memenuhi permintaan industri di mana dianggarkan sebanyak 60% daripada pekerjaan yang diwujudkan dalam tempoh RMKe-11 dijangka

memerlukan kelayakan TVET. Kerajaan akan mempergiat kolaborasi dengan pihak industri untuk mempertingkatkan pengambilan TVET, menambah baik kualiti program dan institusi serta memperkukuh penjenamaan dan profil TVET.

KETIGA, Bidang Fokus C iaitu memperkukuh pembelajaran sepanjang hayat untuk peningkatan kemahiran bagi membolehkan rakyat Malaysia mendapat latihan semula dan peningkatan kemahiran secara berterusan untuk memenuhi permintaan pasaran buruh. Fokus ini tidak terhad kepada tenaga kerja sedia ada, malahan meliputi individu di luar sistem pendidikan formal, yang tidak bekerja atau bersara.

KEEMPAT, Bidang Fokus D iaitu menambah baik kualiti pendidikan untuk meningkatkan outcome pelajar dan kecemerlangan institusi melalui Pelan Pembangunan Pendidikan Malaysia 2015 hingga 2025 (Pendidikan Tinggi) yang dilancarkan pada tahun 2015. Pelan ini akan menjana lonjakan besar dalam pengoperasian sistem pendidikan tinggi dengan melahirkan graduan holistik, berciri keusahawanan dan seimbang.

Tuan Yang di-Pertua,

Selain itu, bagi menangani isu pengangguran ini, Kerajaan Persekutuan juga melaksanakan program untuk membantu mempertingkatkan kualiti mahasiswa dan program di universiti bagi meningkatkan kadar kebolehpasaran graduan yang majoritinya tergolong dalam umur belia. Graduan yang mencari pekerjaan juga turut dibantu, antaranya di bawah Program Skim Latihan 1Malaysia (SL1M), *Graduate Employability Management Scheme* (GEMS), program perantisan, *Bridging Gap Programme* dan latihan keusahawanan.

Sekian, terima kasih.

27 Julai 2017